



## INTRODUCZIUN

DA SER JAN-ANDREA BERNHARD

*Tgi che vul veser enzatgei dalla regiun, va sin ina muntogna – nus ella Foppa schessen sil Péz Fess ni sil Péz Tumpiv – e mira lunsch d'entuorn. Denton: Sche je mon silla pezza, patratgel normalmein buca grad vida purtar ina buna nuviala, mobein gaudel plitost la biala survesta...*

*Il profet Jesaja raquenta denton sur dad in «silla pezza» ch'annunzia la pasch, ina legreivla nova. Veramein: Sin muntognas vesan'ins buca mo pli lunsch, mobein san ins era exclamar bunas novas, lunsch entuorn.*

*Ella lecziun dad oz dat ei plaids consolonts che nies Segner e Salvador retuorni... Naturalmein: Sin ina muntogna ni silla pezza vesan ins meglier sia returnada...*

*Sco buobet vai jeu empriu ordadora, adina a caschun da Nadal: «Und wäre Christus tausendmal in Bethlehem geboren, und nicht in Dir: Du wärest doch in alle Ewigkeit verloren» (Angelus Silesius). Gie, sche nies Segner e Salvador retuorna, lu duei el vegnir en miu cor – el cor da Jerusalem ed el cor dils cartents e spitgonts. Lu savein cantar, giubilar ed engraziar a quel che porta consolaziun e cunfiert a siu pievel e liberescha nossas olmas dalla tema e dils puccaus. Ludaus seigi il Nievnaschiu!*

## 1. LECZIUN

*Jes 52,7–10*

Con emperneivels ein sin las muntognas  
ils peis da quel che porta buna nuviala,  
che annunzia la pasch,  
che vegn cun nova legreivla  
annunziond salvament,  
che di a Sion: Retg ei tiu Diu!  
Audas! Tes observaturs aulzan la vusch.  
Els giubileschan tuts ensemes,  
pertgei els vesan da fatscha en fatscha  
il retuorn dil Segner a Sion.  
Cantei, giubilei,  
tut vus ruinas da Jerusalem!  
Pertgei il Segner porta consolaziun a siu pievel,  
el liberescha Jerusalem.